

Inatsisartut suleriaasianni § 33 naapertorlugu matumuuna Inatsisartut aalajangernissaannik imaattumik siunnersuuteqarpunga:

**Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasamik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Sianerfigisinnaasatigut nuna tamakkerlugu kalerriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni.**

**Ulloq unnuarlu sianerfigisinnaasap ilusilernissaanut Naalakkersuisut kommunit peqatigalugit aalajangiisinnaatitaassapput. Siunertarineqartoq, tassaasoq innuttaasut tamarmik pisariunngitsumik pisortanut sianersinnaalernissaat sumiginnaanernillu kalerriisinnaalernissaat taamaalilluni anguneqassaaq.**

(Inatsisartunut ilaasortaq Naaja H. Nathanielsen, Attaviitsoq)

### **Tunngavilersuut**

Nunatsinni sumiginnagaasut qassiuneri oqaatigeqqissallugu pisariaqanngilaq. Imigassartornerujussuarmik, persuttanernik, kinguaassiuutitigut kanngutsaatsuliornernik ikiaroonartunillu atornerluinernik annertuumik nanertorneqartut tamatta isumaqatigiissutigisinnaagipput isumaqarpunga. Ajornartorsiutillu tamakku nunatsinni meerartatsinnik imaannaanngitsumik eqquisuupput. Angajoqqaat namminneerlutik ajornartorsiutiminnit aniffissaaruttut, qitornaminnillu nammineerlutik isumaginninnissaminnut nukissaaruteqqasut, tassaapput uagut inuiaqatigiinni takunngitsuusaaginnarsinnaanngisavut.

Nunarput kaajallallugu angerlarsimaffimmini akuerineqarsinnaanngitsumik atugaqartunik, taakkunanilu ilaquuttat ajornartorsiutiminnik aniguniarlutik isumaginninnermut pisortanut suli attaveqarsimanngitsuni meeraqartoq ilisimavarput. Ilaqutariit inuunermi ajornartorsiuteqartut pisortat tungaannit akuleruffigineqannginnerinut pissutaasut ilagivaat nunatsinni isumaginninnermut tunngasunik ingerlatsiveqarfinni pinartunik aaqqiinarnernik tamakkiisumik ulapputeqartoqarnera.

Nakkutilliinnermut nalunaarusiat naapertorlugit ersarissumik takuneqarsinnaavoq kommunit maannakkut suliassaminnik nanertugaanermi pisinnaanertik naammaginartumik atorsinnaajunnaangaleraat. Eqqarsaatigisassarlu alla tassaavoq illoqarfinni mikinerusuni nunaqarfinnilu innuttaasut tamarmik imminnut ilisarissimaffiini inuunermi ajornartorsiuteqartunik tikkuartuinissaq ajornakusoorsinnaasarmat. Tamannalumi meeqqat sumiginnagaasut pillugit nalunaaruteqartarnernut atatillugu piviusumik ajornartorsiutaasoq ataasiaannarani tikkuarneqartarsimavoq.

Ajornartorsiut tamanna aaqqiiviginiarlugu tamanit toqqaannartumik, ulloq unnuarlu akeqanngitsumillu sianerfigineqarsinnaasumik pilersitsineq aqutissaasinnaavoq, aammalu kinaassutsimik ilisaritngikkaluarluni ingerlanneqarsinnaalluni. Nalunaarutigineqartorlu kommunimut pineqartumut erngertumik ingerlateqqinneqartassaaq.

Isumaga naapertorlugu sianerfigineqarsinnaasup ilusilersorneqarnissaa kommuninut isumagineqarsinnaavoq. Taamatuttaaq qanorpiaq ilusilerneqarnissaa pisortat pineqartut akornanni nalilersorneqarsinnaasorivara. Taamaammallu sianerfigineqarsinnaasumi immikkut atorfilinnik sulisoqartitsisoqassanersoq, imaluunniit ingerlatsinermi suliaqareersunit isumagineqassanersoq aalajangertariaqassaaq.

Uanga isumaga naapertorlugu sianerfigisassami oqarasuaammik tiguisartussat sulianik ilisimannineq toqqammavigalugu nakkutilliisoqarnissaa qulakkeerneqarsimappat isumaginninnermut siunnersortaasariaqanngitsut. Pingaarnerpaarli tassaavoq sianertunik akisartussap inatsisinut tunngasunik apeqqutinut ilisimasaqarnissaa, paasissutissanik pisariaqartunik pissarsiniarsinnaanissaa oqaloqatigikkuminarnissaallu.

Suliassaq isumaginninnermut siunnersortinngortussanut, peqqissaasunngortussanut allanullu isumaginninnermut tunngasunik imaluunniit peqqinnissaqarfimmi siunissami suliaqarusuttunut ilinniarfigilluarneqarsinnaavoq. Sianerfigisassami sulisussat sinerissami sumiluunniit inissimasinnaapput, taamaammallu allaffissornikkut annertuumik nutaamik pilersitsisari-aqarnissaq pisariaqassanani.

Pingaarnerpaasorli tassaavoq siunertarineqartup anguneqarnissaa, tassaavorlu innuttaasut tamarmik sumiluunniit najugaqaralarunik sumiginnaasoqarnerani nalunaaruteqartar-sinnaanissaat.

### **Pisortanut aningaasatigut allaffissornikkullu kingunissat**

Neriuutigaara taamatut toqqaannartumik sianerfigisinnaasap immikkut inissarsiuunne-qassanngitsoq, killormulli periarfissaareersut atorlugit aallartinneqarsinnaasoq, taamatullu kommunit atorfilittaminnut suliffiginnaasaannik nassaarniarnermi nammaqataasin-naajumaartut.

Tamannali Namminersorlutik Oqartussat kommunillu ataatsimoorlutik qanoq pitsaanerpaamik iliorsinnaaneq isumaqatigiissutigereerpassuk aatsaat akineqarsinnaassaaq. Qanorluunniilli pisoqaralarpat toqqaannartumik sianerfigisinnaasap ilusilersornissaanut nukinnik aningaasanillu atuisoqartariaqassaaq. Suliassartaa ukiup affaanik sulinermit (½ AC-årsværk), tassa 250.000-init akisunerussanngitsoq naatsorsuutigineqarpoq. Tamassumalu saniatigut oqarasuaatip pineqartup ingerlanneqarnissaanut aningaasat pisariaqartinneqassapput.

Oqarasuaammik ingerlatsinissamut aningaasartuutissat qanoq annertutiginnissaannut atatillugu ilusiliinissamik aalajangernissaq apeqqutaasussaavoq, taamaammallu matumani annertunerusumik oqaaseqarfigiuminaalluni.

### **Namminersorluni inuussutissarsiuteqarnermut aningaasatigut allaffissornikkullu kingunissat**

Soqanngilaq

### **Innuttaasunut aningaasatigut allaffissornikkullu kingunissat**

Taamatut toqqaannartumik sianerfigineqarsinnaasumik pilersitsinikkut nalunaaruteqartut amerlinissaat, taamatullu angerlarsimaffiup avataani inissiisariaqartarnerit ilaqtariinnilu isumaginninnikut immikkut iliuuseqartariaqarnerit amerlinnaanissaat periaannaapput.

Ilaqtariilli ikiorneqarnissaminnik ikorfartorneqarnissaminnillu pisinnaatitaaffimminnik pisariaqartitaminnillu pisinnaalissappata tamanna iluatsittutut isigisariaqassaaq. Pingaartumik meeqqat ilai meeraanermi sumiginarneqaratik inuusinnaalernissaannut iluaqutaasin-naappat.